

## Evening Dogri (NSD) News

08 Nov. 2025

### खबरां

- प्रधानमंत्री नरेन्द्र मोदी होरें अज्ज उत्तर-प्रदेश च वाराणसी थमां 4 नमियें वंदे भारत एक्सप्रेस रेलगड्डियें गी झंडी दसियै रवाना कीता ते आखेया जे वंदे भारत- नमो भारत ते अमृत भारत जनेइयां रेलगड्डियां भारतीय रेलवे दी अगली पीढी दा आधार बना करदियां न।
- बिहार विधानसभा चुनां दे दुए ते अखीरले चरण दा प्रचार जोरें पर ऐ। राजनीतिक दलें दे बक्ख-बक्ख नेता, मतदाताएं गी अपने पक्ख च करने दी पूरी कोशश करा'रदे न।
- संसद दा स्यालै आहला इजलास पैहली दिसम्बर कोला लेइयै 19 दिसम्बर तोड़ी लगगोग।
- राष्ट्रपति द्रौपदी मुरमू होर अंगोला ते बोत्सवाना दी यात्रा पर रवाना होई गेइयां न। कुसै भारतीय राष्ट्र अध्यक्ष दी इनें दौनें अफ्रीकी मुल्खें दी ए पैहली सरकारी यात्रा ऐ।
- जम्मू-कश्मीर च सुरक्षाबलें कुपवाड़ा दे केरन सैक्टर च घुसपैठ दी कोशश गी नाकाम करदे होई 2 आतंकवादियें गी मारी मकाया ऐ।
- भारत 20-5एं टी आस्ट्रेलिया बश्कार-क्रिकेट मैचें दी श्रृंखला भारत नै कन्नै 1-2 जित्ती लैती ऐ।
- भारतीय निशानेबाज रविन्द्र सिंह नै मिस्र च आयोजित ISSF विश्व चैम्पियनशीप च सुन्ने दा तगमा जितेया ऐ।

<><><><><><>

### PM -Vande Bharat

प्रधानमंत्री नरेन्द्र मोदी होरें अज्ज आखेया जे वंदे भारत- नमो भारत ते अमृत भारत जनेइयां रेलगड्डियां भारतीय रेलवे दी अगली पीढी दा आधार बना रदियां न। प्रधानमंत्री होर उत्तर-प्रदेश च वाराणसी थमां 4 नमियें वंदे भारत एक्सप्रेस रेलगड्डियें गी झंडी दस्सने मगरा किट्ट गी सम्बोधत करा रदे हे। श्री मोदी होरें 3 वंदे भारत रेलगड्डियें दे कन्नै बनारस-खजुराही वंदे भारत रेलगड्डि गी वाराणसी रेलवे स्टेशन थमां झंडी दस्सी। भारतीय रेलवे च नमें बदलावें दी महत्ता पर लौ पांदे होई- प्रधानमंत्री होरें आखेया जे हुन विदेशी पर्यटक बी वंदे भारत रेलगड्डियें गी दिक्खियै रहान न। उनें दस्सेया जे देश च कुल 160 वंदे भारत एक्सप्रेस रेल गड्डियां चला रदियां न ते इस उपलब्धी आस्तै उनें देश दे बसनीकें गी मुबारकबाद दिती।

## Bihar Electioneering

बिहार विधानसभा चुनाव दे दुए ते अखीरले चरण दा प्रचार जोरें पर ऐ। राजनीतिक दलें दे बक्ख-बक्ख नेता, मतदाताएं गी अपने पक्ख च करने दी पूरी कोशश करा'रदे ना। भारती जनता पार्टी दे वरिष्ठ नेता ते प्रधानमंत्री नरेन्द्र मोदी होरें सीतामढी च इक जनसभा कीती। प्रधानमंत्री होरें आखेआ जे मुखमंत्री नीतीश कुमार हुं'दे नेतृत्व च एन.डी.ए सरकार ने बिहार दे लोकें दा भरोसा परतियै जित्तेआ ऐ ते हुन निवेशक राज्य च औने दे इच्छुक ना। बेतिया च इक होर जनसभा गी संबोधित करदे होई प्रधानमंत्री नरेन्द्र मोदी होरें आखेआ जे चला'रदे चुनाव प्रचार दे दरान बिहार दिएं आसें-मेदें ते लक्ष्यें गी लेइयै व्यापक चर्चा होइयां ना। उ'नें आखेआ जे एन.डी.ए. दी डबल इंजन सरकार ने अपनी उपलब्धियें ते भविष्य लेई अपने नजरिये दा परिचय दित्ता ऐ। भारती जनता पार्टी दे वरिष्ठ नेता ते गृहमंत्री अमित शाह होरें पूर्णिया च इक जनसभा कीती ते आखेआ जे प्रधानमंत्री नरेन्द्र मोदी ते मुखमंत्री नीतीश कुमार हुं'दी अगुवाई च बिहार इक विकसित राज्य बनने दी दिशा च अगड़ा बधा करदा ऐ। बी.जे.पी दे वरिष्ठ नेता ते उत्तर प्रदेश दे मुखमंत्री योगी आदित्यनाथ होरें मोतीहारी च इक जनसभा गी संबोधित करदे होई आखेआ जे पिच्छले 20एं ब'रें च एन.डी.ए ते नीतीश कुमार हुं'दे नेतृत्व च बिहार च सुशासन दा आधार मजबूत होआ ऐ। जनता दल-यूनाइटेड दे अध्यक्ष ते मुखमंत्री नीतीश कुमार होरें औरंगाबाद दे रफीगंज ते गया दे इमामगंज च जनसभाएं गी संबोधित कीता। कांग्रेस दिएं वरिष्ठ नेता प्रियंका गांधी होरें कटिहार जिले दे कदवा च इक जनसभा गी संबोधित कीता। महागठबंधन दे मुखमंत्री दे औहद्धे दे मेदवार तेजस्वी यादव होरें जमुई च जनसभा कीती ते आखेआ जे ओहू बेरोजगारी दी समस्या दा हल कडुने लेई वचनबद्ध ना। उ'नें जकीन दोआया कि जेकर महागठबंधन बिहार दी सत्ता च औंदा ऐ तां जनता कन्नै कीते गेदे सब्बै वादे पूरे कीते जाडन। विकासशील इन्सान पार्टी प्रमुख ते महागठबंधन दे उप-मुखमंत्री दे औहद्धे दे मेदवार मुकेश सहनी होरें आखेआ जे बिहार दे युवा बदलाव चांहदे ना। जन सुराज दे संस्थापक प्रशांत किशोर होरें एन.डी.ए दी निर्देआ करदे होई आखेआ जे बिहार च कारखानें ते रोजगार दी कमी ऐ। उ'नें आखेआ जे मतदाता, राज्य च रोजगार दे मौकें ते औद्योगिक विकास दी मंग करा'रदे ना।



## Parl -Winter Session

संसद दा स्यालै आहला इजलास पैहली दिसम्बर कोला शुरु होआ रदा ऐ जेहड़ा 19 दिसम्बर तोड़ी चलोग। ए जानकारी संसदी मामले दे केन्द्री मंत्री- किरन रिजिजू होरें दिती। मंत्री होरें एक्स पर दस्सेया जे माननीय राष्ट्रपति –श्रीमती द्रौपदी मुरमू होरें संसद दे स्यालै आहले इजलास गी इक दिसम्बर थमां 19 दिसम्बर 2025 तोड़ी चलाने दी मंजूरी देई दिती ऐ। उनें आखेया जे उनेंगी मेद ऐ जे प्रजातंत्र गी मजबूती दिंदे होई- लोकें दी उम्मीदें गी पूरा करदे होई ए सत्र सार्थक ते रचनात्मक होग।



## President Tour

राष्ट्रपति द्रौपदी मुरमू होर अंगोला ते बोत्सवाना दी यात्रा पर रवाना होई गेइयां ना। ओ अज्ज रातीं अंगोला पुजगंन। कुसै भारतीय राष्ट्र अध्यक्ष दी इनें दौनें अफ्रीकी मुल्खें दी ए पैहली सरकारी यात्रा ऐ। 8 कोला लेइयै 13 नवम्बर तोड़ी चलने आली इस यात्रा दौरान दपक्खी सरबंधें दी समीक्षा ते नमें क्षेत्रें च साथ-सहयोग बदाने दियें संभावनाएं पर चर्चा होग। बपार- रक्षा- सेहत- बुनियादी ढांचा ते लोकें-लोकें बश्कार साथ-सहयोग बदाने दे बारे च बी इस दौरै दौरान सलाह-सूत्र दी मेद ऐ। प्रोजैक्ट चीता पर बी बोत्सवाना कन्नै सहयोग बदाने गी बी गल्लबात दे एजेंडे च रक्खेया गोदा ऐ। ए यात्रा अफ्रीका कन्नै भारत दे सरबंधें गी होर मजबूत करने ते ग्लोबल साउथ मुल्खें कन्नै सांझ-भ्याली गी मजबूत बनाने पर केन्द्रित ऐ।



## VP Karnataka

उपराष्ट्रपति सी.पी. राधाकृष्णन कल कर्नाटक जाडन जिस दरान ओहू हासन च जैन मुनि ते आध्यात्मिक गुरू शांति सागर महाराज होरेंगी श्रद्धांजलि अर्पित करडन। ओहू महाराज हुं दी मूर्ति स्थापना समारोह ते चौथी प्हाड़ी दे नामकरण समारोह च बी हिस्सा लैडन। श्री राधाकृष्णन मैसूरू च जे.एस.एस उच्च शिक्षा ते अनुसंधान अकैडमी दे 16में दीक्षांत समारोह च हिस्सा लैडन। ओहू कर्नाटक दे प्रमुख मठ केन्द्रें चा इक सुत्तूर मठ दे पराने परिसर दा बी दौरा करडन। उपराष्ट्रपति होर श्री चामुण्डेश्वरी देवी मंदिर ते चेलुवनारायण स्वामी मंदरै च पूजा-अर्चना बी करडन।



## Kupwara Encounter

सुरक्षाबलें कुपवाड़ा दे केरन सैक्टर च घुसपैठ दी कोशश गी नाकाम करदे होई इक सांझे अभियान तैहत 2 आतंकवादियें गी मारी मकाया ऐ। घुसपैठ दी कोशश बारे टकोहदी जानकारी थोहने मगरा एह सांझा तपाशी अभियान रम्भेया गया हा। सेना दी चिनार कोर नै इस बारे इक सोशल मीडिया पोस्ट च जानकारी दिंदे होई आखेया जे सुरक्षाबलें संदिग्ध नक्लो-हरकत दिक्खने परैन्त घुसपैठियें गी ललकारेया- जेहदे चलदे आतंकवादियें सुरक्षाबलें पर अन्नेबाह गोलियां चलाना शुरू करी दिता। एहदे परते च सुरक्षाबलें बी जवाबी कारवाई कीती। अभियान खीरी जानकारी थोहने तोड़ी जारी हा ते होर ब्यौरे गी अजे बलगेया जा रदा ऐ।



## Terror Crackdown

आतंकवादिएं गी मदाद उपलब्ध करोआने सरबन्धी नेटवर्क गी तबाहू करने लेई चलाए गेदे इक बड्डे अभियान दे तैहत जम्मू-कश्मीर दे बडगाम जिले च पुलसै पाकिस्तान ते पाकिस्तान दे नजैज़ कब्जे आहले जम्मू-कश्मीर थमां अपनी गतिविधियां चला करदे जम्मू-कश्मीर दे बसनीक आतंकवादिएं खलाफ बड्डे स्तरै पर कार्रवाई रम्भी ऐ। पुलसा दे इक प्रवक्ता ने आखेआ ऐ जे हासल खूफिया जानकारीं दी बिनाहू उप्पर कार्रवाई करदे होई खानसाहिब, बीरवाह ते बडगाम इलाकें च घेराबन्दी ते तपाशी अभियान चलाए गो। इ'दा मकसद ओकडे लोकें खलाफ कार्रवाई जकीनी बनाना ऐ, जेहडे बन्ने पार बैठे दे अपने रिश्तेदारें दी शैहू पर जम्मू-कश्मीर च आतंकवादी गतिविधिएं लेई रपेआ-पैसा उपलब्ध करोआने दे भैडे कम्म करा 'रदे ना। राष्ट्र-बरोधी गतिविधिएं च मलव्वस होने दे दोष च केई लोकें खलाफ बक्ख-बक्ख दफाएं तैहत मामले दर्ज कीते गे ना। एहू लोक आतंकवादिएं गी साज-समेयान सरबन्धी मदाद उपलब्ध करोआने दे कन्नो-कन्नो, दुश्प्रचार फैलाने ते आतंकवादी गुटें च भर्थी दे बी दोशी ना। छापेमारी दे दरान डिजिटल उपकरण ते ऐतराज़-जोग समेयान जब्त कीता गेआ ऐ। आतंकवादी ढांचे दे खलाफ इस्सै चाल्ली दी कार्रवाई दे तैहत कुलगाम पुलसै बी बड्डे स्तरै पर घेराबन्दी ते तपाशी अभियान चलाए ना। पाकिस्तान ते पाकिस्तान दे नजैज़ कब्जे आहले जम्मू-कश्मीर दे इलाकें थमां गतिविधियां चला करदे आतंकवादिएं दे रिश्तेदारें ते ओवर-ग्राउंड वर्करें दे खलाफ मामले दर्ज कीते गे ना।



## Maoists Surrendered

छत्तीसगढ़ दे गरिबंद जिले च 7 माओवादियें सुरक्षाबलें दे सामने हथियार सुट्टियै आत्म-सम्पर्ण करी दिता ऐ। इनें माओवादियें रायपुर रेंज दे पुलिस महानिरीक्षक अमरेश मिश्रा हुंदे सामने आत्म-सम्पर्ण कीता ते अपने हथियार बी उन्दे हवाले करी दिते। इनें माओवादियें पर कुल 37 लख रपे दा ईनाम घोषित कीता गेदा हा। पिच्छले किश अरसे दौरान बड़ी बद्ध गिनतरी च माओवादी हथियार छुडियै मुखधारा च शामिल होआ करदे ना।

<><><><><><>

## Cricket

भारत ते आस्ट्रेलिया बश्कार 5एं टी-20 क्रिकेट मैचें दी श्रृंखला भारत नै 2-1 कन्नै जित्ती लैती ऐ। ब्रिसबेन दे गाबा च श्रृंखला दे आखरी मुकाबले च खराब मौसम दे चलदे मैच रोकना पेई गया हा- जिस्सलै भारत नै 4 ओवर ते 5 गेदें च बिजन कोई विकट मुहाए दे 52 रन्ज बनाई लैते दे हे। शुभमन गिल ते अभिषेक शर्मा बिलतरतीब 29 ते 23 रन्ज बनाइयै क्रीज पर हे जिस्सलै बरखा दे चलदे मैच रोकना पेया- पर बरखा लगातार जारी रौहने दे कारण मैच अगे नैई खेडेया जाई सकेया।

<><><><><><>

## Shooting Egypt

भारतीय निशानेबाजा रविन्द्र सिंह नै मिस्र च आयोजित ISSF विश्व चैम्पियनशीप च सुन्ने दा तगमा जितेया ऐ। मर्दे दे 50 मीटर पिस्तल मुकाबले च रविन्द्र सिंह नै 569 अंक हासल कीते ते पैहले नम्बर पर रेहा। तोंआई भारतीय निशानेबाज कमलजीत- रविन्द्र सिंह ते योगेश कुमार दी भारतीय टीम नै नै मर्दे दी 50 मीटर पिस्तल टीम स्पर्धा च सांझे तौरा पर इक ज्हार 646 प्वाइंट लेइयै चांदी दा तगमा अपने नां कीता।

<><><><><><>

## Mitti Café

राष्ट्रपति द्रौपदी मुरमू होरें समावेशन- समानता ते अपार संभावनाएं दे प्रतीक दे रूपै च राष्ट्रपति भवन च मिट्टी कैफे दी सराहना कीती ऐ। इक सोशल मीडिया पोस्ट च राष्ट्रपति होरें उत्थे औने आले लोकें गी मिट्टी कैफे च जाइयै खातरदारी दा इक अनोखा ते नमां नंद लैने लेई प्रेरित कीता ऐ। ए कैफे दिव्यांग लोकें ते उन्दे परोआर आलें दे सशक्तीकरण च बड़ी

अहम भूमिका निभांदा ऐ। राष्ट्रपति होरें आखेया जे ए कैफे हंसदे-हंसदे हर औने आहले परोहने दा दिल खोलिया स्वागत करदा ऐ ते कन्ने मता समावेशी समाज बनाने दी बी प्रेरणा दिंदा ऐ।



### PM Advani

प्रधानमंत्री नरेन्द्र मोदी ते उपराष्ट्रपति सी.पी राधाकृष्णन होरें बी.जे.पी दे सीनियर लीडर लाल कृष्ण अडवानी होरें गी उन्दे 98 जन्मदिन उप्पर मुबारकबाद दिती ऐ। अपनी इक सोशल मीडिया पोस्ट उप्पर उनें अडवानी हुंदी नरोई सेहत ते लम्मी अरबला दी कामना कीती ऐ।



### Flight Operation Delhi

नमीं दिल्ली दे इंदिरा गांधी अंतराष्ट्रीय हवाई अड्डे पर सब्भै ब्हाई डोआरियें दी आओ-जाई अज्ज ब्हाल होई गई ऐ। नमीं दिल्ली हवाई अड्डे दे इक ब्यान च आखेया गया ऐ जे उत्थुआं चलने ते उतरने आलियां सब्भै डोआरियां सामान्य रूप कन्नै चला करदियां ना। सब्भनें यात्रियें गी अपने डोआरी बारे ताजा जानकारी हासल करने लेई सरबन्धित एयर लाईन कन्नै सम्पर्क करने दी सलाह दिती गई ऐ। दिल्ली हवाई अड्डे पर कल ब्हाई यातायात नियंत्रण उड्डान योजना प्रक्रिया च मदद करने आली आटोमैटिक बवस्था प्रणाली च कोई तकनीकी खराबी औने कारण जहाजें दे आओ-जाई च विघ्न पेया हा ते मती सारी जहाजें दी आओ-जाई प्रभावित होई ही।



### BSF Marathon

केन्द्र शासित प्रदेश जम्मू-कश्मीर च फ्रंटियर मुख्यालय बी.एस.एफ जम्मू आसेआ आयोजित पैहली-पैहली जम्मू बी.एस.एफ. मैराथन-2025 लेई 6 ज्हार शा मते लोकें अपने नांऽ दर्ज करोआए ना। एहू मैराथन कल जम्मू दे पलौडा इलाके च स्थित बी.एस.एफ. कैंपस च अयोजित होगा। इस मैराथन च 42 किलोमीटर, 21 किलोमीटर, 10 किलोमीटर ते 5 किलोमीटर दिआं द्रौडां शामिल न ते पूरे भारत थमां प्रतिभागी एह्दे च हिस्सा लैडन। इस कार्यक्रम गी शुरु करने आस्तै जं'दे रोज पलौडा च इक प्रेस कांफ्रेंस दा सरिस्ता कीता गेआ-जेह्दी अध्यक्षता बी.एस.एफ जम्मू दे आई.जी शशांक आनंद होरें कीती।

## Patnitop Marathon

जम्मू संभाग दी मशहूर सैलानी थाहर पत्नीटॉप च कल 9 नवम्बर गी भारत दी सबनें शा शानदार हिल रेस 'पत्नीटॉप मैराथान-2025' दा आयोजन कीता जा'रदा ऐ। मुल्ख भरै थमां प्रतिभागी इस मैराथान दिएं बक्ख-बक्ख श्रेणियें च हिस्सा लैडन- जिं'दे च 50 किलोमीटर दी अल्ट्रा मैराथन, 21 इशारिया 1 किलोमीटर लम्मी हॉफ मैराथन, 10 किलोमीटर, 5 किलोमीटर ते कन्नै इक वाँकाथान बी शामिल ऐ। आयोजकें दस्सेआ ऐ जे इस कार्यक्रम दे राहें प्रतिभागियें गी तंदरुस्ती दे कन्नो-कन्नो शानदार प्हाड़ी बजारें दा नंद ठोआने दा बी मौका थ्होग। इस मैराथन च हिस्सा लैने लेई पंजीकरण आहली प्रक्रिया जारी ऐ ते जेह्दे बी लोक इ 'नें द्रौड़ें च हिस्सा लैना चांहदे न, ओहू अपना नांऽ दर्ज करोआई सकदे न।

